

E ASUNTO DI EXTRADICION TA UN HACHA PONI RIBA NOS CABEZ

ORANJESTAD (AAN) -- Mirando e desaroyonan bon y malo cu ta tumando lugar na Aruba, un anciano riba ochenta aña, den combersacion cu DIARIO, tabata sacudi cabez pensativamente manera cu e kier bisa "no e cosnan aki no ta posibel cu ta na Aruba, nos isla stima itan ta sosode".

"Tin cosnan cu por ta no ta drenta mi cerebro gasta caba, pero di algo si mi ta sigur mi ta sinti mi mes cu basta forza pa protesta cu loke nos tin cu wanta aki na Aruba.

No puntra mi mes, ta di kico ami lo a protesta, pasobra cu cualkier Arubiano cu tin Aruba na pecho sa hopi bon kico nos tin cu soporta riba nos mesun tera.

Cuanto cos nos tin cu tende, mi shon, antes nos no tabata sa pasa den preocupacionnan grandi.

Nos, wel tabata biba pover, pero hamber no a mata ningun di nos aki na Aruba, pasobra tera tabata produci y tambe crianza di bestianan y pisca tabata nos alimentonan preferi.

Nos tabata uza nos awa di renbak te hasta pa bebe, cushina y muha mata, nos tabata haci trabao di construcion cu e awe aki, entre otro bira cement".

"Tempo di Lago, y di Dos Guera Mundial nos tabata un isla cu a briya den noticia internacional, pasobra apesar di cu Merca tabata tin tur sorto di artiyeria, ningun caminda nan por a move sin e yudanza di e combustible di Aruba.

Aruba tabata suministra e combustible pa nan artiyerianan pa nan por a enfrenta e Alemannan, esaki tabata un yudanza y algo hopi grandi cu Merca no a haya na ningun caminda solamente na Aruba.

Awe, falta poco na Merca kier come nos yiunan di tera, despues cu algun traidor a bende nos cu e asunto di extradicion.

E cos aki, ta un maldicion masha grandi mez, un condena sin nomber cu awor Merca kier bin pone riba lomba di e Arubiano, despues cu algun bende patria y traidornan cu ta yama nan mes Arubiano a manipula cierto cosnan den exterior.

Awor, nos tur na Aruba tin cu tapa cu e mesun kleechedi di malhechornan, Arubianonan ta e criminalnan di mas grandi den asunto di laba placa".

"Mi no sa si mi ta mucho bobo, pero temponan aya Bo ta uza e palabra laba, ora cu di asunto di laba paña, laba curpa, laba cas y demas cosnan.

Pero, te hasta mi mester a puntra hende kico e asunto di laba placa aki kiermen, pasobra nunca antes mi a tende di dje aki na Aruba.

Claro mi a lanta tempo cu honestidad y palabra di hende tabata tin hopi balor y tabata sagrado.

Awendia, cualkier hende por gafia y hinca otronan den problemanan serio, manera cu mi mes por a ripara.

Bolbiendo na e asunto di laba, cu tur e edad grandi aki cu mi tin, ta poco tempo pasa mi a bin compronde kico e ta.

Despues, nan a bin splica mi cu e tin hopi di haber cu e asunto di droga, y cu poco poco a worde introduci na Aruba te cu awor nos ta yen di hendenan di mal ehempel cu a bin cu nan sistema y a lanta nan mesun negoshinan cu e asunto aki di labamento di placa".

"Nos no por acusa ningun hende ni generaliza, pasobra mester di prueba, y ainda tin

hopi hende decente y cu nan negoshinan decente y cu ta traha limpi.

Pero, ta di unda a drenta tanto placa asina na Aruba, pa otro nacionalidadnan manera algun Macamba, Mericano, Hindu, Pakistani, y algun nacionnan mas bin lanta emporionan, consorcionan, restaurantnan, hotelnan, edificacion luhoso y ademas placa pa paga cantidad di empleadonan?

Con ta para cu algun di esnan cu ta traha cu e asunto aki, di laba placa y cu ta biba na grandi na Aruba?

Nan tambe lo worde extradita pa nan stop di haci cos di mal ehempel na nos pais, of nan si por keda aki haci y deshaci y e yiu di tera si ta haya su cabez kita afo?

Ta pesey mi tin cu reconoce cu ami ta bobo, pasobra mi a lanta den cunucu y mi por corda, cu nos ta bay Playa riba burico bende nos fruta y berduranan compra cos cu placa gana cu sodo di nos frenta".

"Añanan despues nos tabata cumpra nos cosnan na lugarnan manera Tiende El Gallo, Niki Habibe, Tienda Habibe lugarnan bon surti, y di leu por a nota nan hendenan di respet, honesto y trato sincero nunca nos a tende e asunto ey di hendenan meti den droga y labamento di placa na Aruba.

Mi ta corda tambe e famianan cu a traha duro y cu

placa gana cu sodor di nan frenta, manera e Van der Ree, e Arends, e Mansur, Lacle, Odubernan, y demas hendenan cu tabata bon conoci na Aruba di antes, tanto na San Nicolas como na Playa cu tabata e centronan comercial mas actibo e temponan aya.

Y nunca, pero nunca ningun hende tabata tende algo di cu tin labamento di placa, y asunto di Mafia y Narcotrafico y Narcocomplaciente y cuanto cos mas.

Nos tabata rondona di naturaleza manera mondi, cadushi cabrito y buriconan na cantidad tabata tin cabaynan tambe, nos tabata pover humilde pero hende drechi".

"Cada famia tabata tin un of mas burico, mi ta corda con hunto cu mi casa y ainda un mucha riba scochi di e mama nos ta move tur caminda riba burico.

Den, nos modernismo y prosperidad di awe nos tin cu soporta di biba bao ley y poderman straño cu kier caba cu nos futuro generacionnan cu e asunto di extradicion na unda cu yiu di mama por haya nan mes envolvi den cualkier malora y ata nan den problema di deportacion.

Con, lo para cu mi yiunan, nieto y bisanietonan y cu mi demas famia, mi conocirnan y Pueblo di Aruba general si algun hende acusa nan di algo cu nan no a haci anto mester

manda nan Merca bay putri den nan prissonnan?

Mi mes a papia cu mi yiunan, pa nan papia cu nan yiunan pa nan evita problema y confrontacion cu algun hende Mericano.

Mi a haci esaki, pasobra mi nieto di binticinco aña tin un mucha muher Mericano menor di edad, anto si algo mester sosode cu e mucha aki, sigur mi nieto lo worde extradita pa Merca?

Mi ta di acuerdo cu tur hende cu si un hende haci malo, e mester paga pa esaki, pero como cu leynan ta asina troci awendia nunca uno sa kico por pasa?

Esnan cu ta di acuerdo cu esaki, a para pensa un rato cu nan por tin algun yiu, ruman, tata, of otro familiar, conocirnan cu por cay den e trampa aki di extradicion?

Ken na Aruba lo por bay biba cu un ley maldito asina aki, esaki si ta di mas, pa nos yiunan di tera bay putri den prissonnan den otro tera?

Con lo por bishita un hende bao acusacionnan y sera, por ta te hasta inocente den un tera leu sin e consuelo di su mesun hendenan, sin por haya nan bishita?

Segun mi, ta asina e desgracia aki ta bay funciona na Aruba, ami ta un hende di edad grandi caba y sigur lo mi no tey mas pa weita e desastre aki".

